



禮儀典第三百十六卷

賞賜部彙考四

書經 甘誓

用命賞于祖

傳

天子親征必載遷廟之祖主行有功則賞祖主前示不專也

仲虺之誥

德懋懋官功懋懋賞

傳

勉于德者則勉之以官勉于功者則勉之以賞

泰誓

功多有厚賞

注

若功多則有厚賞非特一爵一級而已

禮記 曲禮

大夫七十而致事若不得謝則必賜之几杖

注

不得謝謂君不許其致事也凡所以馮杖所以倚

賜之使自安適也

賜果于君前其有核者懷其核御食于君君賜餘器之漑者不寫其餘皆寫

大

戴氏曰果核餘物

也不敢棄君之餘器用微物也不敢同君之器所以習臣子恭順之心于人情慢易之際也

王制

天子賜諸侯樂則以祝將之賜伯子男樂則以鼗將之

陳將之謂使者執此以將命也疏曰祝節

一曲之始其事寬故以將諸侯之命鼗節一唱之終其事狹故以將伯子男之命

諸侯賜弓矢然後征賜鈇鉞然後殺賜圭瓚然後爲鬯未賜圭瓚則資鬯于天子

陳祭酒灌地降

神必用鬯故未賜圭瓚則求鬯于天子賜圭瓚然後得自爲也

月令

孟春之月立春之日天子親帥三公九卿諸侯大夫以迎春于東郊還反賞公卿大夫于朝命相布德和令行慶施惠下及兆民慶賜遂行毋有不當

孟夏之月立夏之日天子親帥三公九卿大

夫以迎夏于南郊還反行賞封諸侯慶賜遂行無不欣悅

孟秋之月立秋之日天子親帥三公

九卿諸侯大夫以迎秋于西郊還反賞軍帥武人于朝

孟冬之月立冬之日天子親帥三公九

卿大夫以迎冬于北郊還反賞死事恤孤寡

集說嚴陵方氏曰古者賞以春夏刑以秋冬此則四時

皆賞何也蓋春夏非不刑也特順陽義故以賞為主爾秋冬非不賞也特順陰義故以刑為主爾此則喜其氣之至故皆行賞以飾其喜也

玉藻

有慶非君賜不賀

陳

君賜如爵命土田車服之類皆是也言卿大夫士之家設有喜慶之事若是

君命所賜則當賀非君賜則不賀蓋以君賜爲榮也一說有慶而君亦慶之則餘人亦致賀君無所賜則餘人不必賀也

君賜車馬乘以拜賜衣服服以拜賜

陳

君賜及門既拜受矣明日又乘服詣君所而拜謝其賜所

謂再拜敬之至也

君賜稽首據掌致諸地

陳

據按也致至也頭及手俱至地也

酒肉之賜弗再拜

陳

酒肉之賜輕故惟拜受于家而已

凡賜君子與小人不同日

陳

君子小人以位言君子曰賜小人曰與貴賤殊故不可同日也

賞賜部總論

春秋四傳 莊公元年

春秋冬十月王使榮叔來錫桓公命

注 錫賜也追命桓公褒稱其德

公羊傳錫者何賜也命者何加我服也其言桓公何追命也

注 增加其衣服令有異于諸侯禮有

九錫一曰車馬二曰衣服三曰樂則四曰朱戶五曰納陛六曰虎賁七曰弓矢八曰鈇鉞九曰種

鬯皆所以勸善扶不能言命不言服者重命不重其財物禮百里不過九命七十里不過七命五

十里不過五命

穀梁傳禮有受命無來錫命錫命非正也生服之死行之禮也生不服死追錫之不正甚矣

注 賞

人于朝與人共之當召而錫也周禮大宗伯職曰王命諸侯則饋之是來受命

胡傳啖助曰不稱天王寵篡弑以瀆三綱也春秋書王必稱天所履者天位也所行者天道也所賞者天命也所刑者天討也今桓公弑君篡國而王不能誅反追命之無天甚矣

文公元年

春秋夏四月天王使毛伯來錫公命

注 諸侯即位天子錫以命圭合瑞爲信僖十一年王賜晉侯

命亦其比也

公羊傳錫者何賜也命者何加我服也

注

古者三載考績三考黜陟幽明文公新卽位功未足施

而錫之非禮也

胡傳諸侯終喪入見則有錫歲時來朝則有錫能敵王所愾則有錫黻冕圭璧因其終喪入見而錫之者也禮所謂喪畢以士服見天子已見賜之黻冕圭璧然後歸是已車馬衰黼因其歲時來朝而錫之者也詩所謂君子來朝何錫予之雖無予之路車乘馬又何予之元袞及黼是已彤弓玆矢因其敵愾獻功而錫之者也詩所謂彤弓昭兮受言藏之我有嘉賓中心貺之鐘鼓既設一朝享之是已今文公繼世喪制未畢非初見繼朝而獻功也何爲來錫命乎故穀梁子曰禮有受命無來錫命來錫命非正也

大杜氏曰

諸侯卽位當朝于王奉天子之命而爲諸侯文公不朝于京師而王反

錫之命故書天王以正其號錄錫命以志其過或問趙子謂直譏其賞無功爾安得云無錫命乎

成公八年

春秋秋七月天子使召伯來賜公命

注

八年乃來緩也天子天王王者之通稱

疏

天子賜諸侯之

命書傳亦無正禮唯文公元年天子使毛伯來錫公命僖十一年傳王賜晉惠公命周語王賜晉文公命皆是卽位而賜之又賜之以圭擬朝而合瑞諸侯卽位禮必朝王明當卽位卽賜之命今八年乃來是緩也

胡傳諸侯嗣立而入見則有賜已修聘禮而來朝則有賜能敵王所愾而獻功則有賜成公卽位喪服既畢而不入見既更五服一朝之歲矣而不入京師又未嘗敵王所愾而有功也何爲來賜命乎召伯者縣內諸侯爲王卿士者也來賜公命罪邦君之不王譏天子之僭賞也

大高氏曰周之所

以王者以其秉天子之權而行天下之義也賞在我罰在我是天子之權也賞可賞罰可罰是天下之義也及其衰也有其權而無其義故賞罰俱濫而天子之權猶在也迨其衰之甚也天子之權去矣其位與諸侯夷矣其待諸侯有賞而無罰矣春秋所書天王加恩于諸侯者甚衆而懲御諸侯者無見焉權去而威不行也不能致罰則吾之賞也不足以爲諸侯之榮亦不足以勸諸侯之功又不足以服諸侯之心徒取悅于人耳此天子來賜命所以譏也

大夫有獻弗親君有賜不面拜爲君之答已也

集說嚴陵方氏曰此謂諸侯大夫諸侯雖有君道然

亦天子之臣耳故于大夫有相答之禮焉獻弗親有賜不面拜非敢怠也慮煩君之答已而已

馬氏曰非不役志于獻而有慢君之賜也蓋禮無不答而上之不虛取于下也爲其君之答已故弗親不面拜禮從其簡而已亦所以尊君也

樂記

昔者舜作五絃之琴以歌南風夔始制樂以賞諸侯

集說李氏曰舜知樂之情故作五絃之琴以歌

南風夔識樂之文故制樂以賞諸侯延平黃氏曰歌南風和天也賞諸侯和人也諸侯之受賞

亦貴致其和而已德盛而教尊則其德和于人五穀時熟則其德和于天樂者象德而賞之也

故天子之爲樂也以賞諸侯之有德者也德盛而教尊五穀時熟然後賞之以樂故其治民勞者其

舞行綴遠其治民逸者其舞行綴短故觀其舞知其德

集說長樂陳氏曰諸侯德盛而教尊五穀時

熟然後天子賞之以樂者以其人事修于下天時應于上然後可以樂其樂也又樂書曰天下

有道禮樂自天子出故諸侯有德天子得爲樂以賞之德盛于內而日新教尊于外而日隆則人

和于下矣五穀種之美而以時熟焉則天地之和應于上矣人和于下天地應于上則德教洽而民氣樂其賞之樂以彰有德不亦宜乎 馬氏曰五穀時熟有富之意也德盛而教尊有教之意也有富與教則諸侯之德備然後賞之以樂賞之以樂者言賞之以備樂也德大者然後得其樂之備德小者則雖有常數而不得備故其治民之勞逸者其舞之所以不同也 延平周氏曰聖人之賞樂以治民爲主 慶源輔氏曰以舜之事觀之則天子之爲樂非特自象其功德而又欲以賞天下諸侯之有德者使天下諸侯皆法象天子之德也人事至而天時未應其德猶未至也況樂者天地之和也必俟乎天時應五穀熟然後賞之

賞賜部藝文一

賞張仁愿制

唐中宗

朕聞將帥興功本期于邦國帝王懸賞用答于疇庸持節朔方道大總管右屯衛大將軍張仁愿器宇端雅風神秀傑謀韜玉帳寄重金壇故得累司文武歷參邊鎮蘇門作牧旣無東顧之憂榆塞總兵方釋北乘之慮而乃躬先士卒負土築城橫卻月于天街劃長雲于地脈宜列河山之賞式崇帶

礪之榮進封韓國公賜物三百段及衣裳一副

賜成王千里衣物勅

同前

畫巡周衛夜警巖廊旣曰爪牙實稱心腹左金吾衛大將軍成王千里聲高沛獻德邁二南以磐石之崇班當執金之重寄察姦無對討猶若神固已威動千廬勤宣五校近者衛仗之內輒有作僞之人曾不斯須遽令擒獲能官之目久已馳芳稱職之名從茲著號可賜衣一副兼賜物一百段

爲納言姚璿謝勅賜飛白書表

節

李嶠

跪承寶貺仰戴瓊文如披七曜之圖似發五神之檢九霄靈澤與垂露而同霑千載嘉祥與廻鸞而竝集冠六文而首出掩八體而孤鶩眇乎如薄霧之拂春林藹乎似輕雲之上秋漢工踰懸帳妙盡刻符鍾繇竭力而難比伯英絕筋而不逮則知乃神乃聖包衆智而同歸多藝多才總羣方而兼善臣等才埒瓶簪任叨衡石慶方行而已及澤未溥而先加殊恩與骨肉等深縟禮共衣冠相絕今復親陪睿賞特流宸翰羸氏之魂遊天上未比超昇闕生之名在月中詎方遐邈昔者韓陵深博肇蒙于署劍田鳳名流僅聞于題柱未有芝英草聖近縟于綵牋合璧連珠俯光于掌握在臣叨忝獨冠

古今方且示彼記言傳諸貽訓表一人之殊寵留百代之榮觀手舞足蹈先申踴躍之心摩頂至踵
豈答生成之施無任欣戴之至

爲定王謝賜錦表

前人

承輝日月漸潤雲霄叨符聖慈累延宸照遂得入陪金殿出捧玉輿瑤水叅八駿之遊璿臺翊三龍
之舉榮兼侍從寵冠宗枝捧日無以儷其歡登天未足儔其樂昔蟻封啟繇不廻叅乘之恩駟馬從
良寧承附輿之澤在臣叨忝實邁古今徒欣不世之榮豈望非常之賜況臣地兼臣子職奉君親暫
尋咫尺之途纔捧神仙之馭有何殊効合降隆施陛下恩愛曲成綢繆累洽俯頒珍異猥及庸微跪
開緘題伏視文彩爛若朝霞之初起燦如春花之競發成都濯具本自非儔朝鮮製衣制如難擬方
且裁而學政希勉力于天工服以晝遊庶光榮于戚里功微施廣徒益慚惶恩重命輕罔知酬答無
任悚佩之至

謝賜香藥面脂表

張九齡

捧日月之光寒移雪海沐雲雨之澤春入花門雕奩忽開珠囊暫解蘭薰異氣玉潤凝脂藥自天來

不假淮王之術香宜風度如傳荀令之衣臣才謝中人位忝上將疆場効淺山岳恩深唯因受遇之多轉覺輕生之速臣無任云云

謝冬至賜羊酒等表

常袞

臣某言中使某至奉宣恩命以至節賜臣者聖旨頻降榮賚過優以周官百品之珍載頒其實雖魏臣五熟之釜豈容其多受賜踰涯拜恩失次臣出自孤微素常貧苦食不滿腹竊誠修身且祭不掩豆飯惟脫粟昔賢之美其儉可師敢望豐盈重彰尸曠而雨露偏施歲時益榮俾奉先之饗味兼陸海合族之宴甘及膏粱又沐深慈下霑中饋以感以慶啟處難勝無德無功慚惶罔極

爲宰相謝賜果實等表

孫逖

臣等今日頻承賜賚累降珍鮮飽德空深荷恩無力伏以甘果之實今則非時寧唯自遠而來固亦以少爲貴當供御膳以備天廚何幸小人之腹忽辱非常之賜未施塵露空忝稻粱悚戴慚惶罔知攸措謹奉表陳謝以聞

代武中丞謝新茶表

柳宗元

臣某言中使竇某至奉宣聖旨賜臣新茶一片者天譴忽臨時珍俯及捧戴驚忤以兢以惶臣以無能謬司邦憲大明首出得親仰于雲霄渥澤遂行忽先霑于草木況茲靈味成自遐方照臨而甲拆惟新煦嫗而芬芳可襲調六氣而成美扶萬壽以効珍豈臣賤微膺此殊錫銜恩敢同于嘗酒滌慮方切于飲冰撫事循涯隕越無地臣不任感戴欣忤之至

謝勅書賜春衣并尺表

令狐楚

臣某言去二月中使某至伏奉勅書手詔并賜臣春衣一副牙尺一條宸翰蕤蕤寵錫稠疊捧受榮忭如將不勝臣聞衣裳在笥與必有道刀尺爲器用惟其人臣魯國小儒漢庭下士因緣霑澤汗染官牒顏嘗忍愧心不容憂陛下仁發于中惠周于外矜臣以濕暑之患賜之葛衣念臣無忤度之能降其寶尺輕新有楚廣狹不踰被服而炎蒸坐銷秉持而長短立辨揆才量力將何補于分寸運肘延頸實有塵于領袖當期畢命無以酬恩臣無任

賜南平王李德政曆日詔

宋宋祁

頒曆之義以初爲常俾一天下之歸用謹人時之授以卿列壤南裔率職本朝宣我恩化慰彼黎庶

每屬歲元之會必榮廟朔之藏朕亦推處機祥裁輔舒慘申命太史分次左方宜按象以奉行表布和之胥洎特茲馳錫勿怠欽承

謝賜漢書表

歐陽修

俯躬承命拭目生輝竊以右文興化乃致治之所先著錄藏書須太平而大備惟漢室上繼三代之統而班史自成一家之書文或舛訛蓋其傳之已久詔加刊定俾後學之無疑一新方冊之文增煥祕書之府而奏篇之始方經衡石之程賜本之榮惟及鈞樞之近敢期格外特與恩頒此蓋伏遇皇帝陛下曲軫睿慈俯矜舊物謂其嘗與臣鄰之列不忍遽遺憐其自喜文字之間俾之娛老然臣兩目昏眊雖嗟執奏之已艱十襲珍藏但誓傳家而永寶

謝賜生日禮物表

王珪

聖旨如綍存溫厚于芝函拜錫自天發光華于藹室榮逾素望媿溢常涯伏念臣以固陋之資被睿神之眷迺預塵于政路復冠列于台司歲月崢嶸而屢更精力勤勞而莫補速譏讒于眾口愧功烈于前人逮茲苟完安有橫冀載及桑蓬之序方深帖吧之思念莫報于劬勞敢饗承于恩禮良金燭

乘嚴寶勒于天駒藻帛綢文雜華章于笥服豈翳蕃庶併及衰遲此蓋皇帝陛下敦舜孝以儀民軫堯仁而冒物特厚柄臣之遇過頒御府之珍交乎曲記于賤生博愛乃容于濫賜拜漢庭之寵雖慚稽古之功報周雅之章願上如岡之壽

謝賜對衣金帶馬表

蘇軾

服章在笥賁及衰殘銜勒過庭喜先徒御伏以物生有待天地無窮草木何知冒慶雲之渥采魚蝦至陋借滄海之榮光雖若可觀終非其有妻孥相顧驚屢致于匪頒道路竊窺或反增于指目此蓋伏遇太皇太后陛下聰明齊聖陳錫載周含垢匿瑕而察于求賢卑宮菲食而侈于養士士豈輕于千里念非其人言有重于兼金當思所報

賞賜部藝文二

詩

奉和賜詩

隋許善心

帝道屬昇平天文預觀象滋生荷化育博施多含養正始振皇風端居留眷想夕拜參近侍朝恩濫弘獎溫樹貴不言克艱庶無爽

賜房元齡詩

唐太宗

太液仙舟迴西園
隱上才未曉征車度
雞鳴關早開

賜蕭瑀詩

同前

疾風知勁草
昏日辨誠臣
勇夫安識義
智者必懷仁

謝賜衣

明高啟

臚呼遙捧賜拜服
望蓬萊香帶爐烟下
光迎扇月開
奇文天女織新樣
內家裁被澤徒深
厚慚無奪錦才

賞賜部紀事

史記晉世家文公修政施惠百姓賞從亡者及功臣大者封邑小者尊爵從亡賤臣靈叔曰君三行賞賞不及臣敢請罪文公報曰夫導我以仁義防我以德惠此受上賞輔我以行卒以成立此受次賞矢石之難汗馬之勞此復受次賞若以力事我而無補吾缺者此受次賞三賞之後故且及子晉人聞之皆說

周語簡王八年魯成公來朝使叔孫僑如先聘且告見王孫說與之語說言于王曰魯叔孫之來也必有異焉其饗覲之幣薄而言諂殆請之也若請之必欲賜也魯執政唯疆故不懼焉而後遣之且其狀方上而銳下宜觸冒人王其勿賜若貪陵之人來而盈其願是不賞善也且財不給故聖人之施舍也議之其喜怒取予也亦議之是以不主寬惠亦不主猛毅主德義而已王曰諾使私問諸魯請之也王遂不賜禮如行人及魯侯至仲孫蔑爲介王孫說與之語說讓說以語王王厚賄之

左傳昭公二十年齊侯將飲酒徧賜大夫曰二三子之教也苑何忌辭曰與于青之賞必及于其罰在康誥曰父子兄弟罪不相及況在羣臣敢貪君賜以干先王 三十二年十二月公疾徧賜大

夫大夫不受賜子家子雙琥一環一璧輕服受之大夫皆受其賜己未公薨子家子反賜于府人曰吾不敢逆君命也大夫皆反其賜

新序佛肸以中牟叛置鼎于庭致士大夫曰與吾者受邑不吾與者烹大夫皆從之至于田卑曰義死不避斧鉞之罪義窮不受軒冕之服無義而生不仁而富不如烹褰衣將就鼎佛肸脫屣而生之趙氏聞其叛也攻而取之聞田卑不肯與也求而賞之田卑曰賞一人以慚萬夫義者不取也我受